

Yetsi-ni udhelha Pabluha ge ka benne ria leke Jesucristuha se'eke lhe'esi Colosas

1 ¹Neti Pablo ankaa apóstol ge Jesucristuha. Tata Do Yebáha-ba bedá lebie kini akaa apóstol. Neti lenia betsi to geri'i Timoteo-ni ²ridhelhatu yetsi-ni gele, lebi'i xa betsi to kia se'ele lhe'esi Colosas-na. Lebi'i nuná chi ulesi Tata Do Yebáha le kini akale gebie lhe anágaba rudo tsitsibale tisa gebie de chi babale len Cristuha.

Xxudiri'i do yebáha lhe Jesucristu benne anke Xxanari'iha lhe, lake edá leke aka lenke le lhe use'eke le xen su lasi lhe.

Pabluha rugwebie Tata Do Yebáha ixkixaru

³Tti rinnabatu gele len Tata Do Yebáha, delába Xxudi Jesucristu benne anke Xxanari'iha, satíaba rugwetue ixkixaru gele, ⁴kumu de binatu lebi'i chiba ria lele ge Jesucristuha, lhe anágaba binatu deki gwa rakabinle ge iyá ka benne chi ankake gebie. ⁵Ruinle aná kumu de chi xen lele dhile elha tse nu chi tua tse gele yebáha. Tti biyieninle ka tisa ka nu ankake nu gwalí, delába ka tisa tse rigixxi'a ge Jesucristuha, la'ania nuha binale deki dhile elha tseha. ⁶Ka tisa-ni nuní bisiake len lebi'i lhe anágaba chigaba radhike itúba yiesi lo yu-ni lhe. Ka benne-ni nuní rotseake elha ruin ge ka benne. Aníha-gaba benke len lebi'i, nna debá tti biyieninle ka tisa-ni nna ute denle deki gwalíga rakani Tata Do Yebáha gele. ⁷Ka tisa-ni nuní bele'eni Epafra-ni le. Benne-ni rakintu gebie lhe rixúbie len ri'itu lo sina ge Cristuha. Labie anke ttu benne rudo tsitsibe tisa ge Cristuha kini rute nábie len lebi'i. ⁸Lagabe utixxi'anie ri'itu deki Espíritu ge Tata Do Yebáha-ba runie kini lebi'i rakinle ge adí ka benne.

⁹De nuha nna ri'itu, debá la sá tti binatu geleha, labí rudú siitu a ilhapitu tisa len Tata Do Yebáha. Rinnabatu gele kini labie unie ki tte daa tsenle nu raka lebie uinle, lhe anágaba utebie len lebi'i iyá elha yuu lhe elha rieni ge Espíritu geeha lhe. ¹⁰Aníha kini tse'ele uinle atti galába runi ka benne chi ankake ge Jesús benne anke Xxanari'iha, tse'ele uinle iyá nu dika tsu'u lebie, delába uinle iyá nu anka tse lhe isinle uinbia tserule Tata Do Yebáha lhe. ¹¹Benneha ra xxeni lebie nna unie, kini kweki tsitsi lele kini anáchu utto uchíale lo iyá nu ratele. ¹²Aníha nna len elha gwedeaka lasi ugwele Tataha ixkixaru, kumu lee chi benie kini akari'i benne dika dhiri'i nu chi ga'ananie utebie lenri'i, delába ri'i ka benne chi se'eri'i lhe'e xiani geeha lhe ankari'i gebie lhe. ¹³Labie bebeabie ri'i lhe'e chulha nu ra tsitsi leniha nna bottebie ri'i ata rinnabia Xi'inie Jesucristu benne rakanie geeha. ¹⁴Xi'inieha, de reni belalieha nna utixe geri'i. Aníha kini bese'e lhaari'i lhe bixú elha xen lasi ge ka tulha geri'i lhe.

De lo iyá tte nu se'e, Cristuha anke benne ra xxeniru lebie

¹⁵Tata Do Yebáha labí rilenri'i benneha, ttaka tti benbiari'i Cristuha, Tata Do Yebáha nuha benbiari'i la'ania, kumu Cristuha anke atti tteba anka benneha. Lee nuha chila doe attili lani kwe yiesi lo yu-ni lhe anágaba anagabe nu ra xxeniru leni delo iyá tte nu ben Tata Do Yebáha. ¹⁶Labie nuha bixúni Tata Do Yebáha kini benie iyá tte nu se'e yebáha lhe iyá tte nu se'e yiesi lo yu-ni lhe, ka nu rilenri'i lhe ka nu abittu rilenri'i lhe. Gaxabasina ankakana, sila ankakana ka nu rinnabia lhe sila ankakana ka nu ra tsitsi lekani lhe, sila ankakana ka nu loni lhe o sila ankakana ka nu rapa lo neda lhe, iyába ka nu se'e, len Cristuha-ba benie kana lhe anágaba ge Cristuha-gaba ankakana lhe. ¹⁷Cristuha chila do benneha attili lani aka iyá tte nu se'e, lhe anágaba de labie nna iyá tteba nu se'e, se'ebakana attiba ankaba geni. ¹⁸Lagabe nuha anke nu loni ge ka benne ria leke bie. Labie nuha anke attisidiba iki ka benneha; ka benneha nna ankake attisidiba latie. Lhe anágaba, lagabe nuha anke benne sisi'a tte beyadha benbie lo elhuttiha. Aníha kini delo iyá tte nu se'e, labie nuha ake nu ra xxeniru leni. ¹⁹Kumu Tata Do Yebáha uka lebie eya'anna itú tte nu ankeha len Cristuha ²⁰lhe Cristuha-gaba

nuha bixúni Tata Do Yebáha kini bedo tse lenie iyá tte nu se'e yiesi lo yu-ni lhe nu se'e yebáha lhe. Bedo tse lenie ka nuha de reni belali Cristuha lo ya kurusiha.

²¹Lebi'i itú ttuha, attiba nu dittu ukale len Tata Do Yebáha lhe labí uka uyúle benneha lhe. La'ania belababa lele nu satsa lhe benbale nu satsa rakaba lele lhe. ²²Ttaka len elhutti gwate Cristuha tti bitee yiesi lo yu-ni, len elhuttiha chi bose'e tsebie le len Tata Do Yebáha nnanna, kini anáchu utso dubie le arlo Tata Do Yebáha, chi ankale nari xú lhe abitturu tulha gele tee lhe anágaba abittugaba bixa ge itisale. ²³Aní aka ganna lebi'i tsia tsitsi lele lhe tse'e tsitsile lo neda gebie lhe, anágaba uxxen lele ge nu ra ka tisa tse biyieninle ge Cristuha, abittu udhanle ke. Ka tisa-ni nuní chi ugwadhi itúba yiesi lo yu-ni nna neti Pablo ankaa benne rigixxi'aya ke.

Pabluha ruse'e tsitsie ka benne chi ria leke Cristuha

²⁴Nnanna du itta lasia kumu de lebi'i nna ratea ruyúa elha disa. Len elha disa ratea-ni, len nuní rodha'aya nu riyasa sate Cristuha kwenta ge ka benne chi ria leke bie, kumu lake nuha ankake ttiba latie. ²⁵De ka benneha nna ankaa benne rixúa lo sina ge Tata Do Yebáha. Ruinbaa nu chiba bedha'ane unia, delába ida'aba kixxi'ania le ka tisa geeha kini lebi'i saría tsena le. ²⁶Ka tisa-ni nuní tenie gatsi itú nu reha, ttaka nnanna chi bele'ebie ka tisa-ni len ka benne chi ankake gebie. ²⁷Ka benne chi ankake geeha, ka benneha nuha uka lebie ule'enie ke deki lebi'i ka benne dittu abittu ankale nu Israel, ralhagabale edí baale ge elha tse nu tenie gatsi, delába nu tenie gatsiha ankana deki Cristuha nuha chi doe lhe'e lastole. De nuha nna ruxxen lele dhile nu xxeni ra le Tata Do Yebáha.

²⁸Ge Cristuha nuha rekitu rigixxi'entu iyá xea ka benne, ratu ke gasina dika uinke lhe rugwegabatu ke elha rieni lhe. Aníha ruintu kini itá suba akake tti otso dutu iyáke arlo Tata Do Yebáha de babake len Cristuha. ²⁹De nuha nna neti runia doelha reki rigixxi'aya ge Cristuha, kumu lee nuha ribeki tsitsie lasia.

2 ¹Neti raka lasia unale, tsitsiba ratea reki rigixxi'aya ka tisa-ni de lebi'i lhe de ka benne se'e lhe'esi Laodicea-ni, lhe de iyá tte ka benne abittu chi ankabiakanie neti lhe.

²Ratea aní kini lebi'i dhu itta lele lhe tse'e tsitsile lhe. Aníha

kini tse'e tutupale de rakin ge luesile axtaliba ganna chi bisinle tte da tsenle gasina anka nu teni Tata Do Yebáha gatsi ttuha, delába nu tenie gatsi ttuha ankana labí chi yu ka benne ge Cristuha. ³Len Cristuha nuha saxxakari'i iyá looba elha rieni lhe elha yuu lhe. ⁴Rigixxi'ania le nuní, kini abittu tsia lele ge ka nu rotsi'inu lekani rinnekana nu anka gwen lasi, kini aníha nna dhi yiekana le. ⁵Neti, meskiba doa idittu, ttaka ttisidiba gwa dubaa len lebi'i kumu satíaba rexxa lasia le. Redeakati de riláti latsiruba ruinle lhe gwa ria tsitsiba lele ge Cristuha lhe.

Gwaluni attiba raka le Cristuha uinle

⁶Laxkala attiba chi ria lele deki Jesucristuha nuha anke Xxanari'i, anágaba nna gwaltse'e gwaluni attiba rakaba lebie. ⁷Gwaludaxxu tsitsi neda gebie lhe gwaltsia tsitsi lele gebie lhe. Gwaluni atti tteba chi bidetile lhe anágaba satíagaba gwalugwe Tata Do Yebáha ixkixaru lhe.

⁸Gwaluyú gele abittu tsia lele ge ka nu daa lenkana elha rieni nu abittu ixú lhe nu abittu daka lhe, kumu luesi elha rieni-na ankaba nuná nu rotsi'inu le ka benne. Ankaba nuná ge yiesi lo yu-ni, labí anka nuná elha rieni nu rute Cristuha. ⁹Kumu Cristuha, tti bitee yiesi lo yu-ni, itúba nu anka Tata Do Yebáha nuha uke. ¹⁰Anágaba lebi'i chigaba ankale ida'a de babale len Cristu benne anke nu loni ge iyá tte ka espíritu ka nu rinnabia lhe ka nu ra xxeni lekani lhe. ¹¹De Cristuha-gaba nna lebi'i attisidiba rúba lo bela latile, aníha kini rula'a deki gwalí ankale ge Tata Do Yebáha. Sun tteba nna labí gwalí ruu lo bela latile tti runi ka benne Israel-ni, kumu ka benneha richú lo bela latike. Ttaka lebi'i de chi babale Cristuha, de nuha nna attisidiba chiba uchúbie lo bela latile tti utuabie nu satsa reta lele ruinleha. ¹²Atti udile indaha, la'ania nuha attisidiba bigatsibale len Cristuha, lhe anágaba nna beyaka bengabale len benneha de ugía lele deki Tata Do Yebáha tsitsi ra lebie belhidhe benneha lo elhuttiha. ¹³Lebi'i la'ania attiba ttu nu yatti ankale arlo Tata Do Yebáha de ka tulha ruinleha lhe de abittu ruu lo bela latile lhe, ttaka Tata Do Yebáha benie kini beyaka benle itupa lenle Cristuha tti uxíe elha xen lasi ge iyá ka tulha geleha. ¹⁴La'ania nuha utuabie yetsi ata dia bipaxa nu satsa benri'i. Yetsiha nuha rukina geri'i nna utuabie

na tti utá Cristuha lo ya kurusiha. ¹⁵Lo ya kurusiha-gaba utuabie nu tsitsi ra le ka espíritu satsa, delába ka espíritu ka nu rinnabia lhe ka espíritu ra xxeni lekani lhe. Tti chi udaabie lo ka espírituha, elhittu nuha begwebie kana arlo ka benne se'e yiesi lo yu-ni.

¹⁶Laxkala abittu dhielhale kua ka benne bala'ana gele ge nu role lhe ge nu ri'ale lhe, nigaba kuakana bala'ana gele de abittu retabinle ge ka sá tti raka ka laní-na lhe tti redá ka beo kubi-na lhe tti risia ka sá reyaka leri'i lhe, ¹⁷kumu iyá nuní sunruba ukana ttiba lixxína benne chi ga'anna isiaha. Ttaka benne chi ga'anna isiaha, benneha nuha gwalíga anke kwínaga Cristuha. ¹⁸De nuha nna ka nu runi deki yalhaba ria lekani Tata Do Yebáha rudú xibikani arlo ka anjeli geeha lhe anágaba ruinkana ttaba rákana deki rula'akinna ttu bixa, ka nuná bittu dhielhale gekani tti rákana deki teeki uinle nu ruinkana, kumu ka nuná nu anka gebakani rinnekana. ¹⁹Ka nuná labí se'ekana len Cristu benne anke nu loni ge ka benne ria leke bie. Ttiba ikiri'i-ni yietina latiri'i lhe denna itúba ka bini latiri'i lhe, anágaba ka benne ria leke Cristuha yietigabake bie. Benneha runie kini rise'e tsitsike lo neda geeha attiba rakaba le Tata Do Yebáha.

²⁰Kumu lebi'i attisidiba chiba uttile len Cristuha. De nuha nna ttisidiba lanúrule se'e ki uinle nu rotsi'ínu le ka nu se'e yiesi lo yu-ni. Ganna aníha chi ankale nna, ¿beakala nna sa rudobale tisa ge ka nu rákana: ²¹“Bittu udaxxulu nuná, lhe bittu golu nuná lhe o bittu kanlu nuná lhe.” ²²Kumu iyá nu ra ka nuná ankabana nu riria iki ka benne. Ankaba nuná nu kwa kwaba rise'e loona de rixuinri'i na. ²³Gwalí galá, labí dika innári'i deki labí anka nu rinne ka nuná nu dika ixú kumu gwa rule'ebakana gasina teeki udú xibiri'i arlo Tata Do Yebáha lhe gwa rule'ebakinna ri'i abittu uinri'i ttaba lhe anágaba gwa rule'egabakana gasina ugwe latiri'i elha disa, ttaka iyá nuná labí ixúna kini kuana nu satsa reta leri'i ruinri'i.

3 ¹Laxkala lebi'i ganna gwalíga chi beyaka benle len Cristuha, gwaludo lele nu anka ge yebáha ata do Cristuha, delába daka ná ben ge Tata Do Yebáha. ²Gwaludo ikile nu anka ge yebáha, abittu udo ikile nu anka ge yiesi lo yu-ni, ³kumu lebi'i attisidiba chiba uttile, labíru se'ele ki uinle nu satsa ruinle ttuha, ttaka nnanna de chi babale len Tata Do

Yebáha, len Cristuha nuha chi tua tse elha nabani gele. ⁴Tti esia Cristu benne rutebie elha nabani geri'iha, tti esie dedábie yebáha, anágaba lebi'i la'ania tse'egabale lenbie lhe'e xiani geeha.

Abittu uinle nu anka satsa, gwaluinla nu anka tse

⁵De nuha nna chinka gwalikua iyá nu satsa ruinle, delába bittu isále nu subi subi lhe bittu uinle iyá nu utsigana le arlo Tata Do Yebáha lhe. Anágaba bittu uinle iyá nu satsa rulaba lele lhe iyá nu reta lele ruinle lhe. Abittugaba udona lele gatta xxatta belhiu gele, kumu belhiu-na attiba ttu diosi reyaka nuná gele. ⁶Kumu delo ni'a ge nuná nna rise'iki Tata Do Yebáha nna rugwebie elha disa ka nu abittu rudokana tisa gebie. ⁷Lebi'i anágaba benle atti sa rekibale ruinle nu anka satsaha, ⁸ttaka nnanna chinka gwalikua iyá elha rise'iki gele lhe iyá nu satsa rulha lele lhe. Anágaba gwalikuagaba iyá nu rinne satsa ge luesile lhe iyá tisa satsa yu'u ro'ole lhe. ⁹Nu anka gwalí gwalinne, abittu la len luesibale uin lele, kumu lebi'i chiba bedhanle nu ankale ttuha, delába chiba bedhanle nu satsa benle ttuha, ¹⁰nnanna nna chiba beyakale benne kubi; ttu ttu sába diale axtaliba ki isinle akale atti ttega anka Tata Do Yebáha, delába benne benie leha. Aníha kini isinle uinbia tsegalee. ¹¹Ganna chi beyakale benne kubiha, la'ania nna labíru raka doelha si ankale benne Israel o abittu, lhe anágaba labíru raka doelha si gwa ruu lo bela latile o abittu, lhe nigaba si ankale benne yuu o abittu. Anágaba labíru raka doelha si ankale benne to'ole lo sina o abittu, sinuki Cristuha-la nuha rakaru doelha lhe lagabe nuha doe lhe'e lasto iyá tteri'i lhe.

¹²Laxkala de rakani Tata Do Yebáha gele lhe de chi bekwebie le kini akale gebie, de nuha nna gwaluin ge benne ratua lasi lhe ge benne re tse lebie lhe. Anágaba gwaluin ge benne abittu runi ttaba lhe ge benne abittu ruin disa lhe. Anágaba gwaluni ge benne re besi lebie lhe. ¹³Gwalutto gwaluchíaba ge nu rudhaka luesile lhe gwalidhíba elha xen lasi ge luesile ttixka nuxa ttúle bixa ruinle. Gwaluni attiba ben Cristuha, benneha gwa uxíbe elha xen lasi gele. ¹⁴Iki de iyá tte nuní nna nu rakarula doelha akin ge luesile. Kumu elha si'i lasi-na nuná ruse'ena ri'i tutupa, ruse'ena ri'i attiba ankaba geni. ¹⁵Cristuha xen su lasiba udúbie lele, kumu de nuha-la

uxie le kini akale attisidiba ttúba benne lenie. Anágaba nna ugwegabalee ixkixaru.

16Ka tisa ge Cristuha tsu'u tamake lhe'e lastole. Len elha rieni rute Tata Do Yebáha gwalule'en luesile lhe gwalodú itta le luesile lhe. Itú iki itú lele gwalugwe bie ixkixaru tti ulhale ka le'a gebie, **17**lhe anágaba bixaba innele lhe bixaba uinle lhe, tti uinle aníha exxa lele Jesús benne anke Xxanari'iha. Kumu de benneha nna ugwele Xxudiri'i do yebáha ixkixaru.

¿Gasina dika uin ka benne chi ria leke Cristuha?

18Lebi'i ka benne nuila ata se'e latselale, gwaludo tisa ge ka benne biyú gele-na, kumu aná dika uinle de chi ankale ge Jesús benne anke Xxanari'iha. **19**Lebi'i nna ka benne biyú ata se'e latselale, akinle ge ka benne nuila gele-na nna abittu uyú satsale ke.

20Lebi'i nna ka nu kwiti, gwaludo tisa ge ka tata nan gele-na ge iyába nu innáke kumu aná ru'u le Jesús benne anke Xxanari'iha. **21**Lebi'i nna ka tata, abittu utse'enle ka xi'inle-na kini abittu udú chupana lekani.

22Lebi'i nna ka benne ata to'ole lo sina, ge iyá tte gwaludo tisa ge ka benne ankake xxanale yiesi lo yu-ni. Bittu suna attiruba du xxanaleha rulannina gele nna jeru tteba ribenle sina sunruba ki eya'an tsele arloni, sinuki itú iki itú lele gwalikwen sina de tee elha rasi gele len Jesús benne anke Xxanari'iha. **23**Bixaba sina uinle, gwaluin na itú iki itú lele. Bittu akinle deki sina ge ka benne se'e yiesi lo yu-niba nuha ruinle, gwaluni attisidiba sina ge Jesús benne anke Xxanari'iha-ba nuha ruinle. **24**Lebi'i gwa yúbale deki Jesús-ni gutebe nu ralhale dhile ge nu ruinle, kumu lo sina gebie nuha rixúle. **25**Ttaka nu ruin satsaha dhiba nuha elha disa ge nu satsa ruinnaha, kumu Tata Do Yebáha rutebe nu tse len ka benne ruin latsiru lhe rutegabe elha disa ge ka nu ruin satsa lhe. Ruinba benneha elhuxtisi attiba ankaba geni.

4 **1**Lebi'i nna ata ankale xxana ka sina, latsiru gwaluin len ka benne riben lo sina gele-na lhe gwaluyú ke attiba ankaba geni lhe. Gwaludhá lele deki anágaba lebi'i dogaba ttu Xxanale yebáha.

Gwalilhapi tisa len Tata Do Yebáha lhe latsiru gwaluni lhe

2Gwaludo lele gwalilhapi tisa len Tata Do Yebáha. Bittu udú siile a innele lenie lhe gwalugwe bie ixkixaru lhe.

³Anágaba gwalinnabagaba getu lenie kini idhalie neda getu ki kixxi'atu nu tenie gatsi ttuha, delába kixxi'atu ge Cristuha. Kumu de rigixxi'iatu ge benneha, de nuha nna xigaa tea lisiyya. ⁴Gwalinnaba kia kini ganna chi kixxi'aya gebie, lhixxa rába kixxi'aya attiba ankaba geni.

⁵Lebi'i gwaluin doelha ixuinle ka sá se'ele-na kini uinle latsiru len ka nu abittu chi ria lekani Cristuha. ⁶Tisa nu inneleha satía akana latsiru lhe nu dika tsu'u le ka benne lhe. Aníha kini yule gasina ekabile ge nuxaba benne innaba tise le.

Pabluha redhelhe padiuxi ge ka benne se'e lhe'esi Colosas

⁷Betsi to geri'i Tíquico-ni, delába benne rakati gebie-ni, benne-ni anke ttu benne rudoe tisa rute nábie len neti lo sina ge Jesús benne anke Xxanari'iha. Labie kixxi'anie le bixa ratea. ⁸De nuha-la nna ridhelhee ata se'ele-na kini kixxi'anie le bixa ratetu lhe anágaba kini odú itte lele lhe. ⁹Dedágaba Onésimo benne lhe'esi gele-na lenbie. Benne-na ankgabe betsi to geri'i lhe rakinri'i gebie lhe ankgabe nu gwedo tisa lhe. Lake kixxi'akanie le iyá nu raka nii.

¹⁰Aristarco benne tee lania lisiyya-ni, benne-ni ridhelhe ttu padiuxi gele lhe anágaba Marcos primu ge Bernabé-ni ridhelhagabe ttu padiuxi gele. Ge Marcos-ni chiba utixxi'ania le, ria: “Ganna ite ata se'ele-na latsiru ulabilee.” ¹¹Anágaba Jesús benne tegaba lábie Justo, ridhelhagabe ttu padiuxi gele. Delo iyá ka benne Israel chi ria leke Cristuha, sunruba tsunna ka benne-ni ribenke len neti kini rigixxi'atu gasina rinnabia Tata Do Yebáha ka benne lhe anágaba rixúgabake kini rodú tseke lasia lhe.

¹²Epafras-ni ridhelhagabe ttu padiuxi gele. Benne-ni ankgabe ttu ka benne gele, rixúbie lo sina ge Cristuha. Labie satíaba rinnabe gele tti rilhapie tisa len Tata Do Yebáha. Rinnabe kini lebi'i tse'e tsitsile lo neda ge Tata Do Yebáha lhe akale benne runi itá su, lhe anágaba kini tte da tsenle iyá nu raka lebie. ¹³Kumu neti yu xeabaa yalhá ruchacha ikie gele lhe ge ka benne se'e lhe'esi Laodicea-na lhe, anágaba ruchachagaba ikie ge ka benne se'e lhe'esi Hierápoles-na lhe. ¹⁴Lucas benne runie ramed-ni, delába benne rakagabinri'i gebie, benne-ni ridhelhagabe ttu padiuxi gele. Anágaba Demas-ni ridhelhagabe ttu padiuxi gele.

¹⁵Ka betsi to geri'i se'e lhe'esi Laodicea-na, gwalugwe ke ttu padiuxi getu lhe anágaba Ninfas-na lhe adíru ka benne chi ria leke Cristuha, delába ka benne ritupake lhe'e lisie-na, gwalugwegaba ka benne-na ttu padiuxi getu.

¹⁶Iki de chi bibaba yetsi ridhelhatu-ni arlole, gwalidhelhagaba na lhe'esi Laodicea-na kini ibabagabana arlo ka benne chi ria leke Cristuha se'eke naa. Anágaba yetsi udhelhaa len ka benne se'e lhe'esi Laodicea-na, edhelagabake nuná kini lebi'i ulabagabale na.

¹⁷Gwaligasi Arquipo-na udo leni uinna sina nu chi bodha'ana Jesús benne anke Xxanari'iha lasi náni.

¹⁸Padiuxi nu ridhelhaa gele-ni, kwinaga neti Pablo runia nuní lo yetsi-ni. Gwalodhú lele deki tea lisiyya. Tata Do Yebáha edá lebie aka lenie le. Amén.